

2021 Rhif (Cy.)

**ARDRETHU A PHRSIO,
CYMRU**

**Rheoliadau Prasio ar gyfer Ardrethu
(Cymru) (Coronafeirws) 2021**

NODYN ESBONIADOL

(Nid yw'r nodyn hwn yn rhan o'r Rheoliadau)

Mae'r Rheoliadau hyn yn pennu'r rhagdybiaethau sydd i'w gwneud wrth gymhwyso darpariaethau isbaragraffau (1) i (7) o baragraff 2 o Atodlen 6 i Ddeddf Cyllid Llywodraeth Leol 1988.

Mae paragraff (1) o reoliad 2 yn pennu'r dosbarth o hereditamentau y mae'r rhagdybiaethau hyn i'w cymhwyso iddo, sef hereditamentau yr effeithir ar eu gwerth ardrethol yn rhinwedd newid perthnasol mewn amgylchiadau a achosir gan un neu ragor o dri pheth. Yn gyntaf, naill ai priod ymateb Llywodraeth Cymru neu ymateb Llywodraeth y DU i'r coronafeirws, neu ymateb y ddwy Lywodraeth iddo. Yn ail, unrhyw ofynion, canllawiau neu gyngor gan awdurdod cyhoeddus yn y Deyrnas Unedig, Llywodraeth Cymru, Llywodraeth yr Alban, Gweithrediaeth Gogledd Iwerddon, Llywodraeth y DU neu Lywodraeth gwlad neu diriogaeth y tu allan i'r Deyrnas Unedig. Yn drydydd, unrhyw fesurau a gymerir gan berson i sicrhau cydymffurfedd â deddfwriaeth iechyd a diogelwch.

Mae paragraff (2) o reoliad 2 yn rhagnodi'r rhagdybiaethau sydd i'w gwneud wrth ganfod gwerth ardrethol yr hereditamentau hynny, sef nad yw'r materion sydd wedi achosi newid perthnasol mewn amgylchiadau wedi digwydd. Rhagdybiaeth ychwanegol yw bod rhaid i'r gwerthoedd ardrethol ragdybio mai'r mesurau sy'n angenrheidiol i gydymffurfio â deddfwriaeth iechyd a diogelwch yw'r mesurau a oedd yn angenrheidiol i gydymffurfio ar 1 Ebrill 2015 â'r deddfwriaeth a oedd yn gymwys bryd hynny.

Ystyriwyd Cod Ymarfer Gweinidogion Cymru ar gynnal Asesiadau Effaith Rheoleiddiol mewn perthynas â'r Rheoliadau hyn. O ganlyniad, ystyriwyd

nad oedd yn angenrheidiol cynnal asesiad effaith rheoleiddiol o'r costau a'r manteision sy'n debygol o ddeillio o gydymffurfio â'r Rheoliadau hyn.

2021 Rhif (Cy.)

**ARDRETHU A PHRSIO,
CYMRU**

**Rheoliadau Prisio ar gyfer Ardrethu
(Cymru) (Coronafeirws) 2021**

<i>Gwnaed</i>	***
<i>Gosodwyd gerbron Senedd Cymru</i>	***
<i>Yn dod i rym</i>	***

Mae Gweinidogion Cymru yn gwneud y Rheoliadau a ganlyn drwy arfer y pwerau a roddir gan adran 143(2) o Ddeddf Cyllid Llywodraeth Leol 1988(1), a pharagraff 2(8) o Atodlen 6 iddi, ac a freiniwyd bellach ynddynt hwy(2).

Enwi, cychwyn a chymhwyso

1.—(1) Enw'r Rheoliadau hyn yw Rheoliadau Prisio ar gyfer Ardrethu (Cymru) (Coronafeirws) 2021 a deuant i rym ar XX XXXXX 2021.

(2) Mae'r Rheoliadau hyn yn gymwys o ran Cymru.

Prisio hereditamentau

2.—(1) Mae'r rheoliad hwn yn gymwys i hereditament y byddai'r gwerth ardrethol a ddangosir ar restr 2017 ar gyfer yr hereditament hwnnw, oni bai am y Rheoliadau hyn, yn cael ei effeithio o ganlyniad i—

-
- (1) 1988 p. 41. Diwygiwyd paragraff 2(8) gan adran 139 o Ddeddf Llywodraeth Leol a Thai 1989 (p. 42) a pharagraff 38(8) o Atodlen 5 iddi. Gweler adran 146(6) am y diffiniad o "prescribed".
- (2) Trosglwyddwyd pwerau'r Ysgrifennydd Gwladol i Gynulliad Cenedlaethol Cymru gan Orchymyn Cynulliad Cenedlaethol Cymru (Trosglwyddo Swyddogaethau) 1999 (O.S. 1999/672) ac maent wedi eu breinio bellach yng Ngweinidogion Cymru yn rhinwedd paragraff 30 o Atodlen 11 i Ddeddf Llywodraeth Cymru 2006 (p. 32).

- (a) naill ai priod ymateb Llywodraeth Cymru neu ymateb Llywodraeth y DU i'r coronafeirws, neu ymateb y ddwy Lywodraeth iddo;
- (b) unrhyw ofyniad, cyngor neu ganllawiau gan—
 - (i) awdurdod cyhoeddus yn y Deyrnas Unedig;
 - (ii) Llywodraeth Cymru, Llywodraeth yr Alban, Gweithrediaeth Gogledd Iwerddon neu Lywodraeth y DU;
 - (iii) Llywodraeth gwlad neu diriogaeth y tu allan i'r Deyrnas Unedig;
 er mwyn ymateb i'r bygythiad difrifol ac uniongyrchol i iechyd y cyhoedd o ganlyniad i fynychder a lledaeniad y coronafeirws;
- (c) mesurau a gymerir gan unrhyw berson i sicrhau cydymffurfedd â deddfwriaeth iechyd a diogelwch.

(2) At ddibenion canfod gwerth ardrethol hereditament y mae'r rheoliad hwn yn gymwys iddo ar gyfer unrhyw ddiwrnod ar XX XXXX 2021 neu ar ôl hynny, wrth gymhwyso darpariaethau is-baragraffau (1) i (7) o baragraff 2 o Atodlen 6 i Ddeddf Cyllid Llywodraeth Leol 1988 rhaid rhagdybio'r canlynol—

- (a) ar y diwrnod hwnnw nad oedd yr ymateb, y gofyniad, y cyngor neu'r canllawiau y cyfeirir atynt yn rheoliad 2(1)(a) a (b) wedi digwydd, a
- (b) y mesurau sy'n angenrheidiol i sicrhau cydymffurfedd â deddfwriaeth iechyd a diogelwch yw'r mesurau a oedd yn angenrheidiol ar 1 Ebrill 2015 i gydymffurfio â'r deddfwriaeth honno.

(3) Yn y rheoliad hwn—

ystyr “awdurdod cyhoeddus” (“*public authority*”) yw person â swyddogaethau o natur gyhoeddus;

ystyr “y coronafeirws” (“*coronavirus*”) yw coronafeirws syndrom anadlol aciwt difrifol 2 (SARS-CoV-2);

mae i “deddfwriaeth iechyd a diogelwch” (“*health and safety legislation*”) yr un ystyr â'r diffiniad o “the relevant statutory provisions” yn adran 53 o Ddeddf Iechyd a Diogelwch yn y Gwaith etc. 1974(1);

mae i “hereditament” yr ystyr a roddir i “hereditament” yn adran 64 o Ddeddf Cyllid Llywodraeth Leol 1988;

(1) 1974 p. 37.

ystyr “rhestr 2017” (“*2017 list*”) yw rhestr ardrethu annomestig leol neu ganolog a luniwyd ar 1 Ebrill 2017;

ystyr “ymateb Llywodraeth Cymru” (“*Welsh Government response*”) yw—

- (a) Deddf y Coronafeirws 2020 neu unrhyw beth a wnaed gan Weinidogion Cymru o dan neu yn rhinwedd y Ddeddf honno;
- (b) unrhyw—
 - (i) rheoliadau a wnaed gan Weinidogion Cymru o dan adran 45C(1) i (4), 45F(2) neu 45P o Ddeddf Iechyd y Cyhoedd (Rheoli Clefydau) 1984;
 - (ii) deddfiadau eraill a wnaed, neu unrhyw beth a wnaed o dan neu yn rhinwedd deddfiad a wnaed, gan Weinidogion Cymru;
 - (iii) canllawiau neu gyngor a ddyroddwyd gan Weinidogion Cymru;

er mwyn ymateb i'r bygythiad difrifol ac uniongyrchol i iechyd y cyhoedd o ganlyniad i fynychder a lledaeniad y coronafeirws;

ystyr “ymateb Llywodraeth y DU” (“*UK Government response*”) yw—

- (a) Deddf y Coronafeirws 2020(1) neu unrhyw beth a wnaed gan Lywodraeth y DU o dan neu yn rhinwedd y Ddeddf honno;
- (b) unrhyw—
 - (i) rheoliadau a wnaed gan yr Ysgrifennydd Gwladol o dan adran 45C(1), (3)(c), (4)(d), 45F(2) neu 45P o Ddeddf Iechyd y Cyhoedd (Rheoli Clefydau) 1984(2);
 - (ii) deddfiadau eraill a wnaed, neu unrhyw beth a wnaed o dan neu yn rhinwedd deddfiad a wnaed, gan Lywodraeth y DU;
 - (iii) canllawiau neu gyngor a ddyroddwyd gan Lywodraeth y DU;

er mwyn ymateb i'r bygythiad difrifol ac uniongyrchol i iechyd y cyhoedd o ganlyniad i fynychder a lledaeniad y coronafeirws.

Enw

Y Gweinidog Cyllid a Llywodraeth Leol, un o Weinidogion Cymru
Dyddiad

(1) 2020 p. 7.
(2) 1984 p. 22.